

Naalakkersuisumik toqqaanissaq

(Naalakkersuisut Siulittaasuut)

Saqqummiussissut

(Naalakkersuisut Siulittaasuut)

1. Siullermeerneqarnera

Naalakkersuisuni ilaasortat katitigaanerisa allanngortinneqarnissaanik inassuteqaatima ullumi Inatsisartut ataatsimiinneranni ullormut oqaluuserisassani ilanngullugu saqqummiunneqarsinnaanissaanut periarfissinneqarama Inatsisartut Siulittaasoqarfiat qutsavigissavara.

Ulloq 27. januar 2017 aallartiffigalugu Martha Lund Olsen Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisutut atuukkunnaarsinneqarpoq.

Tassunga atatillugu periarfissaq manna Martha Lund Olsen Naalakkersuisuni suleqatitut aamma Isumaginninnermut, Ilaqutariinnut, Naligiissitaanermut Inatsisinillu Atuutsitsinnermut Naalakkersuisutut, kinguneratigullu Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisutut sulisimaneranut qutsaviginiarpara.

Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu oqartussaasutut akisussaaffik ulloq 27. januar 2017-ip kingorna Aatsitassanut Ikummatissanullu Naalakkersuisumit Múte B. Egedemit isumagineqarsimavoq. Periarfissaq manna iluatsillugu Múte B. Egede tassani immikkut sulisimaneranut qujassuteqarfígissavara.

Naalakkersuisut katitigaanerisigut allanngortoqarnissaa kissaatigaara. Allanguinerlu tassaavoq Erik Jensen, Siumut, Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisunngortussatut inassutiginiarlugu aalajangersimanera.

Aammattaaq ilisimatitsissutigissavara Vittus Qujaukitsoq, Siumut Naalakkersuisuniit tunuarniarluni kissateqarmat. Tamanna pissutigalugu inassutigissavara Inatsisartuni ilaasortaq Karl-Kristian Kruse, Siumut Naalakkersuisuni ilaasortatut nutaatut ivertinneqassasoq.

Periarfissaq manna atorussuppara Vittus Qujaukitsoq Naalakkersuisuni sulisimaneranik aammalu Inuussutissarsiornermut, Suliffeqarnermut, Niuernermit Nukissiuuteqarnermut Nunanullu Allanut Naalakkersuisuunermini suliaqarsimaneranik qujassuteqarfígissallugu.

Inatsisartut Naalakkersuisut katitigaanissaannik allannguutit akuerissapatigit, Naalakkersuisut Siulittaasup saniatigut 9-nik ilaasortaqaalissapput.

Taamaammat Inatsisartut Naalakkersuisullu pillugit Inatsisartut inatsisaanni § 22, imm. 3 kiisalu Inatsisartut Suleriaasianni § 5, imm. 3 malillugit Naalakkersuisuni ilaasortatut uku toqqarneqassasut inassutigaa:

1. Sara Olsvig, Inuit Ataqtigiit, Isumaginninnermut, Ilaqutariinnut, Naligiissitaanermut Inatsisinillu atuutsitsinnermut Naalakkersuisunngussaaq.
2. Hans Enoksen, Partii Naleraq, Inuussutissarsiornermut, Suliffeqarnermut, Niuernermut Nukissiuuteqarnermullu Naalakkersuisunngussaaq.
3. Aqqaluaq B. Egede, Inuit Ataqtigiit, Aningaasaqarnermut Akileraartarnermullu Naalakkersuisunngussaaq.
4. Agathe Fontain, Inuit Ataqtigiit, Peqqissutsimut Nunat Avannarliit Suleqatigiinneranullu Naalakkersuisunngussaaq.
5. Doris Jakobsen, Siumut, Ilinniartitaanermut, Kultureqarnermut, Iisimatusarnermut Ilageeqarnermut Naalakkersuisunngussaaq.
6. Suka K. Frederiksen, Siumut, Namminiilivinnermut, Nunanut allanut Nunalerinnermullu Naalakkersuisunngussaaq.
7. Múte B. Egede, Inuit Ataqtigiit Aatsitassanut ikummatissanullu Naalakkersuisunngussaaq .
8. Erik Jensen, Siumut, Kommunit, Nunaqarfinnut, Isorliunerusunut, Attaveqatigiinnermut Ineqarnermullu Naalakkersuisunngussaaq.
9. Karl-Kristian Kruse, Siumut Aalisarnermut Piniarnermullu Naalakkersuisunngussaaq.

Soorlu Naalakkersuisut kissaatigisatut katitigaanissaanniit takuneqarsinnaasoq, Karl- Kristian Kruse-p Erik Jensen-illu Naalakkersuisutut toqqarneqarnissaasa sanisigut aaliangersimavunga Naalakkersuisut akornanni suliassat agguataarnerinik allannguissallunga.

Allannguutit tassaapput:

- Suliassaqarfik Inuussutissarsiornermut, Suliffeqarnermut, Niuernermut Nukissiuuteqarnerlu maannamiit Naalakkersuisup Hans Enoksen-ip Partii Naleqqameersup ingerlatilissammagu, tamatumani suliassaqarfik Aalisarneq Piniarnerlu maannamiit Karl-Kristian Kruse-p ingerlatilissammagu.
- suliassaqarfik Nunanut allanut tunngasut maannamiit Naalakkersuisup Súka K. Frederiksen-ip Siumumeersup ingerlatilissammagu,
- kiisalu suliassaqarfik Pinngortitaq Avatangiilillu maannamiit Naalakkersuisup Siulittaasuata ingerlatilissallugu.

Periarfissaq manna atorussuppara Naalakkersuisoq Hans Enoksen, aalisarnermut piniarnermullu suliniutinik ingerlatsisimaneranut qujassuteqarfigissallugu.

Taamatut oqaaseqarlunga Naalakkersuisut katitigaanerat pillugu siunnersuut Inatsisartuni oqaluuserisassanngortippara.